

*Taxistanan ta birando victima di maneho descabeya di Ministro...*

# ELIO NICOLAAS TA MENAZA DI DUNA TE 500 PERMISO DI TAXI

*Hotelnan ta trahando cu ocupacionnan di 31 pa 52 porciento!*



## DIAHUEBS

E MATUTINO DI ARUBA

DIAHUEBS 7 FEBRUARI 1991

ABONADO PA LUNA 19,00 FLS\*\*PA EJEMPLAR 0,80 AÑA10/NO.3255

*Juez a prohibi Gobierno di saca asistente medico*

### Dr. Beke-Martinez a gana caso contra Ministro di Justicia

ORANJESTAD(AAN) -- Recientemente Corte den promer instancia a dicta sentencia den e caso cu Kelvin Antonio Cayama y dr. Lilian G. Beke-Martinez a entama contra Gobierno di Aruba.

Ta asina cu dia 23 di Januari 1991 abogado mr. Kloes kende ta representa Cayama y Beke-Martinez a entama e caso caminda e ta pidi Juez pa prohibi Gobierno pa saca Cayama for Aruba of prohibi su entrada na Aruba sin cu e instancia mas halto a tuma un decision encuan to su permiso fecha 17 di Januari 1991 cu a worde rechaza.

Tambe e ta exigi un dafio per juicio di 50 Mil Florin pa cada dia of parti di un dia cu Gobierno no cumpli cu e exigencia y cu e gastonan di e caso ta cay riba cuenta di Gobierno.

E caso aki mas bien ta entorno e peticion pa prolongacion di permiso di trabao pa Cayama cu a worde rechaza.

E intension tabata cu Cayama lo traha como medico asistente cerca Beke-Martinez. Beke-Martinez a manda un carta pa Ministro di Justicia fecha 11 di Juli 1989 solicitando pa un permiso di permanencia y un permiso pa traha.

Den un carta fecha 25 di Augustus '89, Promer Ministro a notifica Beke-Martinez cu su solicitud a worde trata den Consejo di Ministro.

Segun Promer Ministro, mirando e hecho cu tin diferente Arubiano cu entretanto a termina nan estudio den medicina, mester duna nan prioridad y pa tal motibo no ta honra e peticion.

Beke-Martinez a manda un carta pa Gobierno cu declaracion di adjunt-director di Arubahuis kende a mostra cu pa 1989 y 1990 lo no tin ningun medico Arubano disponible.

Relaciona cu esaki, Beke-Martinez a ricibi un carta di Ministro di Justicia fecha 4 di December 1989 caminda finalmente su peticion a worde honra. E ora ey Cayama a cuminsa traha na Centro Medico Carabobo.

E permiso cu Cayama a haya tabata tin un duracion di 1 aña. Ministro di Justicia a sigui bisa cu no tin posibilidad di prolonga esaki y cu durante e periodo aki Beke-Martinez mester percura di atrae Arubianonan.

E aña a transcuri y dia 11 di September 1990, tres luna promer cu e permiso vence, Beke-Martinez a dirigi un carta na DOOV solicitando pa prolonga e permiso di Cayama ya cu el a trata di atrae mediconan Arubiano pero ningun a muestra interesa.

Dia 17 di Januari 1991 pa medio di un carta Beke-Martinez a worde informa cu su peticion no ta worde honra y cu dentro di 1 siman despues di a ricibi e carta Cayama mester bandona e isla.

Esaki tabata motibo pues pa Beke-Martinez y Cayama entama un caso contra Gobierno.

Juez mr. Heeregrave su decision den e caso aki ta cu ta prohibi Gobierno pa por lo pronto saca Cayama di Aruba y den caso cu e haci un viahe, ora e regresa no por prohibi su entrada te ora su contract cu Beke-Martinez termina. Mientrastanto Cayama mester apela cerca Gobernador e decision di Ministro di Justicia fecha 17 di Januari 1991.

Si encaso Gobernador aproba e decision di Ministro di Justicia, Cayama por acudi un vez mas na Corte caminda Juez lo tuma un decision al respecto.

Juez a rechaza e otro exigencianan y a ordena Gobierno pa cubri e gastonan di e caso.

## ELIA ISENIA REINA DI TUMBA ABC FESTIVAL 1991

